

Supporter-Protokoll vom 15. März 2019

Die 40. GV, s'isch e gueti Wahl,
findet statt im Gmeindrotssaal.

Es Glesli Wii het dunge uf üs gwartet
de si mir mit de Traktande gstartet.

Leider isch s'Jörg Ruth vo üs gange
mir si für ne Truurminute derzue ufgstange.

Dr Äschimaa Willi, das isch keis müesse
darf hüt 35 Mitglieder begrüesse.

8 Mitglieder hei sech öppis angers vorgnoh
und si drum nit a üsi Versammlig cho.

Dr Bume Roli isch gwählt als Stimmezähler
är macht dä Job de sicher ohni Fähler.

Dr Mani liest sis Protokoll, das isch nit d'Norm
denn es isch gschribe in Värsliform.

Im Johresbricht vom Presidänt, do cha me gseh
was s'ganze Johr im Verein isch gscheh.

Mir si uf keim sinkende Schiff
dr Kassier het d'Finanze im Griff.
Dr Martin duet sich bi aune hätzlich bedanke
wo scho izahlt hei die hundert Franke.

S'Bruggmann Ursi het als Revisorin brichtet
und het die Ufgab, au no sehr guet dichtet.

Mir heisse willkomme die elf Neue
und düe üs somit über 93 Supporter freue.

Damit mir bim laufe au chli chöi diskutiere
tüe mir wieder einisch e Wanderig organisiere.

Im Verschiedene het dr Marti Mike gseit
was im FC Zuchu so alles geit.

Dr FC cha, wenn aues guet duet glinge,
ab Oktober uf em neue Kunschtrase springe.

Wenn de länge duet, das liebe Gäld
gits für d'Juniore au es Plastikfäld.

Dr Amme isch ä gschikte Kärli,
är verzöut üs keini Märli.
Är duet üs Zuchu vorstelle
und vo früechere Zyte verzelle.

Es auts Föteli, das isch här scho lang
zeigt bim Näf Otti, dr Bahnübergang.

D'Scintilla het, me dänkt nümm dra,
für d'Arbeiter e egeti Haltstell gha.

Mit de Baute a dr Aare sötts üs glinge,
neui Gsichter uf Zuchu z'bringe.

Dr Badineubau isch uf guetem Wäg
und isch eventuell ab em Juni zwäg.

Dr Stefan het üs sini Lüchtturm zeigt
und si Uftritt de am Änd zue geit.

Für das interessante Vorträge
düe mir mit Applaus merci säge.

D'GV isch jetz fertig und au glunge,
das hei alli Supporter gfunge.

Mir hei de is Boccalino disloziert
dört wird üs e feini Pasta serviert.

Bi Bier und Wy, nach däm guete Ässe,
si mi no gmüetlich zämegsässe.

Mani Wingeier, Zuchu